

B' àbhaist do chroitèaran a bhith a' cruinneachadh an fheamainn dhearg, cairgean agus duilleasg airson biadh. Bha iad cuideachd a' buain mòran ceilp 's ga thiomachadh 's ga losgadh 's ga chuir air an talamh airson a dhèanamh torach. 'S e obair chudromach a bha seo do na croitèaran aig toiseach na linn mu dheireadh. Chan eil e air a chleachdadh an-diugh ach ann an gnìomhachas ceimiceach airson iomadach rud feumail a dhèanamh, m.e reòiteagan, uachdar-fhiaclan, peant agus cungaidhean-leigheis.

Uaireannan, ithidh crodh, caoraich agus feidh feamainn. Chan eil na caoraich air Ronaldsaigh a Tuath ann an Arcaibh ag ithe càil ach feamainn agus tha balla cloiche timcheall an eilein airson an cumail air a' chladach.

Thathas fhathast a' cruinneachadh creachain, srùbain agus faochagan air na cladaichean agus gan reic. Tha feusgain agus eisirean air an àrach air tuathanais eìsg. Tha na feusgain a' fàs air ròpan a tha crochte bho phutan agus tha iad a' toirt dà bhliadhna mus bi iad mòr gu leòr airson an reic. Tha na h-eisirean air an àrach ann an treidheachan sònraichte air tìr agus tha iad sin a' toirt nas fhaide a' fàs. 'S e gnìomhachas mòr a th' ann an tuathanais-bhradain an-diugh air a' Ghàidhealtachd 's anns na h-Eileanan.



*na feidh ag ithe feamainn*

Tha an lach mhòr ag ithe maorach mar feusgain. Tha iad gan sluigéal slàn agus gam pronnadh nan sgròbain làidir. Tha faoileagan a' pronnadh sligean nan sgròbain cuideachd ach tha iad a' cur na sligean a-mach air ais nan gràinein dìreach mar a tha cailleach-oidhch' a' dèanamh air bian agus cnàmhan nach urrainn dhith a chnàmh. Tha an gille-brìghde ag ithe feusgain nas motha agus tha e a' dèanamh toll anns an t-slige le ghob làidir gus am faigh e chun na feòla. Chan eil guib no sgròbain cho làidir aig starragan ach tha iad air ionnsachadh mar a bhriseas iad na sligean le bhith gan leigeil às bho àirde gus am bris iad air na creagan. Coimhead ris na leacan shuas an cladach. Feuch an lorg thu sligean briste a leig na starragan às.



*feusgan*